

Tico Croes

Promer Ministro Oduber mester splica pakico Douane Americano no ta bin mas Aruba

ORANJESTAD(AAN) -- Tico Croes di AVP a duna di conoce na DIARIO cu e Gobierno actual a haci net net nada pa haya Douane Americano na Aruba.

El a splica cu na '87, Aruba a logra haya e sistema si pre inspection cu ta identifica presencia Americano riba nos isla.

Esaki tabata solamente e promer fase di e proyecto. E segundo fase tabata pa haya presencia di Douane Americano na Aruba.

Croes a splica cu e meta tras di esaki tabata:

1. Door di presencia Douane Americano e companianan aereo lo haya esaki mas atractivo. Esaki lo significa un aumento di actividad riba nos aeropuerto.

2. E presencia di Douane Americano lo sirbi den e manejo di combatimento di trafico di droga.

Tabata hopi dificil pa logra haya Douane Americano. Nan ta basa nan mes cu e volumen di pasahero mester ta mas o menos 350 Mil cu ta bula pa Merca.

A pesar di e ponencia aki, Gobierno di AVP a sigui hiba combersacion y a logra cu e funcionario halto van Raab a haci

un bishita na nos isla na September '88 pa pone su mes al tanto di e situacion.

Na mes momento tambe a logra cu congreso Americano na comienzo di '89 a escoge Aruba pa e pilot project.

Croes a enfatisa cu aki claramente a keda demostra cu tur cos tabata cla. Den e fase aki AVP a bay laga e proyecto.

Sinembargo dia 20 di April '90, e mesun personanan cu a vota pa e proyecto bin Aruba, a bisa cu e proyecto ta bay Jamaica.

E pregunta cu AVP ta lanza den e caso aki ta: "Kico Gobierno Oduber a haci durante '89 y '90 pa realisacion di e proyecto aki". Croes ta convenci cu net net nada a ser haci y e resultado tabata cu e congreso a crea e impresion cu Aruba no ta interesa mas den e proyecto.

Croes a enfatisa cu Oduber por a presenta mil documento na television pa trata di demostra cu e trabao tabata hopi dificil pero ningun momento el a focus e bishita di van Raab y e actitud di e congreso Americano.

Croes ta lamenta cu den a penas 1 aña di tempo, e Gobierno actual a causa daño na e im-

agen y credibilidad
internacional di Aruba.

Croes ta kere cu Promer Ministro Oduber debe e pueblo un

splicacion pakico Douane Americano no ta bin Aruba mas.